

«ՄՈՍՅԱՅ ԱՆՏԱՌ» ՊԱՏՄԱՎԱԾՔԸ

Քրիստոսից շատ ու շատ դարեր առաջ, երբ դեռ չկար աշխարհի յոթ հրաշալիքներից և ոչ մեկը, Արարատյան դաշտում տնկվել է Մոսյաց անտառը, որ աշխարհի ամենահին արհեստական պուրակներից մեկն է:

Մովսես Խորենացին գրել է, որ այդ անտառը տնկել է Հայկ Նահապետի որդի Արամանյակը: Այս Արամանյակի որդի Արամայիսն էլ Մոսյաց անտառի կողքին հիմնել է Արմավիր քաղաքը: Մոսյաց անտառը սրբազան վայր էր համարվում: Մովսես Խորենացին գրում է, որ այս անտառին է նվիրվել Արա Գեղեցիկի թոռ Անուշավանը, որի պատճառով էլ ստացել է Մոսանվեր մականունը:

Հնում յուրաքանչյուր երկիր ունեցել է իր սրբազան ծառը: Հունաստանում այդպիսի ծառ է համարվել կաղնին, Հայաստանում՝ սոսին:

Սոսին հեթանոսական Հայաստանի խորհրդանիշն էր՝ Մասիսին հավասարագոր: Հայերը ռազմի դաշտ էին իջնում Մոսյաց անտառը պատկերող դրոշներով:

Ամենքդ էլ գիտեք, որ բոլոր ծառերի տերևներն էլ ինչ-որ չափով կարող են խշխշալ, շնկշնկալ, սվսվալ, փսփսալ, բայց հայոց նախնիք մյուս ծառերի տերևների շարժումներն անիմաստ են համարել և սոսի բառից կազմել սոսափել բառը:

Մոսյաց անտառը գոյատևել է 2300 տարի, Ք.ա.՝ քսանհինգերորդ դարից մինչև երրորդ դարի վերջը: Պատմիչները չեն հաղորդում, թե ինչպես է կործանվել այդ անտառը, որից ոչ մի հետք չի մնացել: Բայց Հայաստանը չէր կարող մնալ առանց սրբազան անտառի: Եվ Արմավիրի Մոսյաց անտառին անմիջապես հաջորդել է Բագարանի «Ծննդոց անտառը»:

Ասում են նաև, որ սոսին հայոց ծառերի նահապետն է. ու կարդում են նույն գրքից մի այլ պատմվածք.

«Հայկ Նահապետի հոր անունը Թորգոմ էր, Թորգոմի հոր անունը՝ Թիրաս, Թիրասի հոր անունը՝ Գամեր, Գամերի հոր անունը՝ Հաբեթ: Հենց սա էլ հայոց առաջին ապուլապան է:

Մի անգամ Հաբեթը թավուտ անտառով անցնելիս սկսում է ինքն իրեն խոսել: Հետո զարմանում է, որ ծառերից ոչ մեկը չի պատասխանում իրեն:

Այա ձայնը բարձրացնում է, բացականչում ամբողջ ուժով: Կանգ է առնում և ունկնդրում: Նրան թվում է, թե ծառերից մեկն արձագանքում է իրեն: Մոտենում է վիթխարահասակ մի ծառի, որն ուներ մուգ դարչնագույն, ձաքձքված կեղևով բուն: Ծառի թաթաձև տերևներն այնպես էին սվսվում՝ ասես զրուցում էին ցածրաձայն: Հենց այդ պահին էլ Հաբեթը ծառը կնքում է սոսի անունով, որ նշանակում է բարձրահասակ, պերճագեղ, սեզ, վեհ: Հետո իր տոհմանդամներին ասում է.

- Խոսել գիտե միայն սոսի ծառը, մնացածները կամ համր են, կամ հայերեն չգիտեն:

Այդ ժամանակվանից էլ սոսին դարձավ հայոց ծառերի նահապետը»: